

Samir Lačević: Kamatne stope će porasti

05 JANUAR 2010

0 KOMENTARI



Rukovodilac za bankarske poslove, edukaciju i trening pri Udruženju banaka BiH Samir Lačević smatra kako će se rastući trend kamatne stope u ovoj godini nastaviti kao što se događalo u protekle dvije godine.

"U BiH tokom 2009. godine nije zabilježen nagli rast kamatnih stopa za poduzeća i građane kako za kratkoročne, tako i za dugoročne kredite, unatoč izraženoj krizi. Kamatne stope za kratkoročne kredite na kraju 2008. godine su poduzeća iznosile 7,42 posto, a na kraju mjeseca novembra 2009. godine iznosile su 8,12 posto. Kamate na dugoročne kredite za poduzeća na kraju 2008. godine su iznosile 7,36 posto, a u mjesecu novembru 2009. godine 7,6 posto", kazao je Lačević za Dnevni list.

Kod stanovništva za kratkoročne kredite na kraju 2008. godine iznosila je 9,85 posto, dok je u novembru 2009. godine iznosila 9,15.

"Dugoročni krediti za stanovništvo su na kraju 2008. godine iznosili 8,98 posto, a u novembru 2009. godine 10,93 posto. Na osnovu ovih podataka možemo vidjeti porast, ali ne toliko visok", tvrdi Lačević. Dodaje da, iako je evidentno da je došlo do određenih strukturalnih poremećaja, u prosjeku po ročnosti i namjeni nije bilo drastičnog povećanja. "Ovakav trend možemo očekivati i u 2010. godini", najavljuje Lačević.

Postupak povisivanja kamatnih stopa već dvije godine zaredom odražava se na poslovanje banaka kroz smanjivanje profitabilnosti. "Trend kamatnih stopa na bankarski sektor u BiH je u direktoj ovisnosti od porasta kamatnih stopa na štednju i depozite i nemogućnost pribavljanja jeftinijih izvora finansiranja iz inostranstva tako da to djeluje i na poslovanje banaka u BiH", kazao je on.

Lačević smatra da je teško utvrditi je li svjetska ekonomska kriza završena, ali mišljenja je da se u BiH njene posljedice tek mogu očekivati. "U BiH možemo tvrditi sa sigurnošću da ekonomska kriza nije završena i da se njene posljedice mogu očekivati i u razdoblju koji slijedi", kaže Lačević. On naglašava da kada su u pitanju promjenjivost kamatnih stopa, vanjski tržišni uvjeti privređivanja na kojim principima posluje BiH bankarstvo su podložni upravo ovim uticajima.

"Ovom prilikom u Udruženju banaka BiH želimo naglasiti da kretanje u najvećoj mjeri ovise od mjera koje se očekuju od nadležnih institucija koje bi trebale ublažiti efekte utjecaja svjetske ekonomske krize", kazao je Samir Lačević. (dnevni list)